



Jumat, 09 Juni 2023

Ogen : Perb. Rasul 16:11-12



Ndalani Kuta Si Pelain-Lain



Ibas kalak Karo, adi lawes ku kuta sideban erkiteken kerja peradaten, si mate-mate ntah kerja tahun, maka igelari nguta-nguta. Adi lawes ku ingan wisata ija pa pe maka igelari gawah-gawah. Gundari enda lit istilah baru, maka adi lawes ku ingan wisata ntah kuta sideban igelari "healing" nina. Healing ertina lanai terjeng menikmati indahna sada lokasi ras suasana mbaru tapi ertujun guna penyembuhen diri erkiteken stress, latih ibas ndalani kerina dahin-dahin.

Paulus selaku ia ipilih jadi Rasul Kristus, nehken pemberitaan Injil ku kerina kota ras kuta-kuta i daerah Asia bagepe seh ku Eropa. Idalanina kuta-kuta e alu semangat labo guna healing/pepalem diri tapi guna pepalem kalak si deban segelah nadingken kiniteken sindekah bengket ku kiniteken i bas Kristus. Ibas teks renungenta teridah uga perdalanan Paulus, arah sada kuta ku kuta si deban janah ngadi i Pilipi. Janah i bas kuta Pilipi enda me Paulus mereken healing man diberu-diberu piahna sekalak diberu si tegelar Lidia, tutus atena megiken kai si ikataken Paulus. Kenca dung sie, ialokenna peridin ibas Paulus nari ras kerina isi jabuna.

Healing labo berarti arus ku ingan si deban gawah-gawah tapi healing si tuhuna eme erpengendes ras ersembah man Tuhan bagepe kita banci ernanam man kalak sideban. Cuba gejakkenndu, adi lit kalak ibas perbeben, isampatindu ia, lepas ia bas perbebenna nari, kai nge si terjadi? Ia pe meriah ukur janah tentu kita si nampati ia pe pasti ermeriah ukur. Me pas nge bagi nina Kata Dibata ras lagu, hati yang gembira adalah obat tapi semangat yang patah mengeringkan tulang! Emaka bahanlah maka ku ja pa pe kita berkat guna nehken pasu-pasu man sekelewetta.